

病源候論



巢氏諸病源候總論卷四十一

婦人妊娠病諸候

上

凡二十論

妊娠候

經云陰搏陽別謂之有子此是氣血和調陽施陰化也
診其手少陰脈動甚者任子也少陰心脈也心主血脈
又腎名胞門子戶尺中腎脈也尺中之脈按之不絕者
妊娠脈也三部沈浮正等按之無斷絕者有娠也又左
手沈實爲男右手浮大爲女左右俱沈實生二男左右
俱浮大生二女又尺脈左偏大爲男右偏大爲女左右
俱大產二子又左右手尺脈俱浮爲產二男不爾女作
男生俱沈爲產二女不爾男作女生又左手尺中脈浮



大者男右手尺脈沈細者女又得太陰脈爲男得太陽脈爲女太陰脈沈太陽脈浮欲知男女遣面南行還復呼之左迴首是男右迴首是女又看上圍時夫從後急呼之左迴首是男右迴首是女婦人妊娠其夫左邊乳房有核是男右邊乳房有核是女任娠一月名曰始形飲食精熟酸美受御宜食大麥無食腥辛之物是謂才貞足厥陰養之足厥陰者肝之脈也肝主血一月之時血流澁始不出故足厥陰養之足厥陰穴在足大指歧間白肉際是任娠二月名曰始膏無食腥辛之物居必靜處男子勿勞百節皆痛是謂始藏也足少陽養之足少陽者膽之脈也主於精二月之時兒精成於胞裏

故足少陽養之足少陽穴在足小指間本節後附骨上
一寸陷中者是 任娠三月始胎當此之時血不流形
像始化未有定儀見物而變欲令見貴盛公王好人端
正莊嚴不欲令見偃僂侏儒醜惡形人及猿猴之類無
食薑兔無懷刀繩欲得男者操弓矢射雄鷄乘肥馬於
田野觀虎豹及走犬其欲得女者則著簪珂環珮弄珠
璣欲令子美好端正者數視白璧美玉看孔雀食鯉魚
欲令兒多智有力則噉牛心食大麥欲令子賢良盛德
則端心正坐清虛和一坐無邪席立無偏倚行無邪徑
目無邪視耳無邪聽口無邪言心無邪念無妄喜怒無
得思慮食無到嚮無邪臥無橫足思欲果瓜噉味酸菹

好芬芳惡見穢臭是謂外象而變者也手心主養之手
心主者脈中精神內屬於心能混神故手心主養之手
心主穴在掌後橫文是診其任娠脈滑疾重以手按之
散者胎已三月也 任娠四月之時始受水精以成血
脈其食宜稻稬其羹宜魚雁是謂盛榮以通耳目而行
經絡洗浴遠避寒暑是手少陽養之手少陽者三焦之
脈也內屬於府四月之時兒六府順成故手少陽養之
手少陽穴在手小指閒本節後二寸是也診其任娠四
月欲知男女左脈疾爲男右脈疾爲女左右俱疾爲生
二子當此之時慎勿瀉之必致產後之殃何謂也是手
少陽三焦之脈內屬於三焦靜形體和心志節飲食

任娠五月始受火精以成其氣臥必晏起洗浣衣服深
其屋室厚其衣裳朝吸天光以避寒殃其食宜稻麥其
羹宜牛羊和以茱萸調以五味是謂養氣以定五臟者
也一本云宜食魚鱉足太陰養之足太陰脾之脈主四
季五月之時兒四支皆成故足太陰養之足太陰穴在
足內踝上三寸也診其任脈脈重手按之不散但疾不
滑者五月也又其脈數者必向壞脈緊者必胞阻脈遲
者必腹滿喘脈浮者必水壞爲腫 任娠六月始受金
精以成其筋身欲微勞無得靜處出遊於野數觀走犬
及視走馬宜食鷲鳥猛獸之肉是謂變腠膂筋以養其
爪以牢其背膂足陽明養之足陽明者胃之脈主其口

目六月之時兒口目皆成故足陽明養之足陽明穴在太衝上二寸是也 任娠七月始受木精以成骨勞躬搖支無使定止動作屈伸居處必燥飲食避寒常宜食稻稊以密腠理是謂養骨牢齒者也手太陰養之手太陰者肺脈主皮毛七月之時兒皮毛已成故手太陰養之手太陰穴在手大指本節後白肉際中是診其任娠七月脈實大牢强者生沈細者死懷軀七月而不可知時時衄而轉筋者此爲軀衄時噫而動者非軀也懷軀七月暴下斗餘水其胎必倚而墮此非時孤漿預下故也 任娠八月始受土精以成膚革和心靜息無使氣極是謂密腠理而光澤顏色手陽明養之手陽明者

大腸脈大腸主九竅八月之時兒九竅皆成故手陽明
養之手陽明穴在大指本節後宛宛中是診其任娠八
月脈實大牢強弦緊者生沉細者死 任娠九月始受
石精以成皮毛六府百節莫不畢備飲醴食甘緩帶自
持而待之是謂養毛髮多才力足少陰養之足少陰者
腎之脈腎主續縷九月之時兒脈續縷皆成故足少陰
養之足少陰穴在足內踝後微近下前動脈是也 任
娠十月五臟俱備六府齊通納天地氣於丹田故使關
節人神咸備然可預修滑胎方法也

任娠惡阻候

惡阻病者心中憤悶頭眩四肢煩疼懈惰不欲執作惡

聞食氣欲噉鹹酸果實多睡少起世云惡食又云惡字是也乃至三四月日以上大劇者不能自勝舉也此由婦人元本虛羸血氣不足腎氣又弱兼當風飲冷太過心下有痰水挾之而有娠也經血既閉水漬於藏藏氣不宜通故心煩憤悶氣逆而嘔吐也血脈不通經絡否澁則四支沈重挾風則頭目眩故欲有胎而病惡阻所謂欲有胎者其人月水尙來而顏色皮膚如常但苦沈重憤悶不欲食飲又不知其患所在脈理順時平和卽是欲有胎也如此經二月日後便覺不通則結胎也

任娠轉女爲男候

陰陽和調二氣相感陽施陰化是以有娠而三陰所會

則多生女但任娠二月名曰始藏精氣成於胞裏至於三月名曰始胎血脈不流象形而變未有定儀見物而化是時男女未分故未滿三月者可服藥方術轉之令生男也

任娠養胎候

任娠之人有宿挾痼疹因而有娠或有娠之時節適乖理致生疾病並令腑臟衰損氣力虛羸令胎不長故須服藥去其疾病益其氣血以扶養胎也

任娠禁忌候

任娠男女未分之時未有定儀見物而化故須端正莊嚴清靜和平無傾視無邪聽兒在胎日月未滿陰陽未

備腑臟骨節皆未成足故自初訖于將產飲食居處皆有禁忌

任娠胎閒水氣子滿體腫候

胎閒水氣子滿體腫者此由脾胃虛弱腑臟之間有停水而挾以任娠故也任娠之人經血壅閉以養於胎若挾有水氣則水血相搏水漬於胎兼傷腑臟脾胃主身之肌肉故氣虛弱肌肉則虛水氣流溢於肌故令體腫水漬於胞則令胎壞然任娠臨將產之月而脚微腫者其產易所以爾者胞藏水血俱多故令易產而水乘於外故微腫但須將產之月耳若初任而腫者是水氣過多兒未成具故壞胎也壞胎脈浮者必腹滿而喘壞娠

爲水腫

任娠漏胞候

漏胞者謂任娠數月而經水時下此由衝脈任脈虛不能約制太陽少陰之經血故也衝任之脈爲經脈之海皆起於胞內手太陽小腸脈也手少陰心脈也是二經爲表裏上爲乳汁下爲月水有娠之人經水所以斷者壅之以養胎而蓄之爲乳汁衝任氣虛則胞內泄漏不能制其經血故月水時下亦名胞阻漏血盡則人斃也

任娠胎動候

胎動不安者多因勞役氣力或觸冒冷熱或飲食不適或居處失宜輕者止轉動不安重者便致傷墮若其母

有疾以動胎治母則胎安若其胎有不牢固致動以病
母者治胎則母瘥若傷動甚者候其母面赤舌青者兒
死母活母唇口青口兩邊沫出者母子俱死母面青舌
赤口中沫出母死子活

任娠僵仆胎上搶心下血候

此謂行動倒仆或從高墮下傷損胞絡致血下動胎而
血傷氣逆者胎隨氣上搶心其死生之候其母舌青者
兒死母活唇口無沫兒生唇青沫出者母子俱死唇口
青舌赤者母死兒活若下血不住胞燥胎枯則令胎死

任娠胎死腹中候

此或因驚動倒仆或染溫疫傷寒邪毒入於胞臟致令

胎死其候當胎處冷爲胎已死也

任娠腹痛候

腹痛皆由風邪入於腑臟與血氣相擊搏所爲任娠之人或宿挾冷疹或新觸風邪疔結而痛其腹痛不已邪正相干血氣相亂致傷損胞絡則令動胎也

任娠心痛候

夫心痛多是風邪痰飲乘心之經絡邪氣搏於正氣交結而痛也若傷心正經而痛者爲真心痛心爲神統領諸藏不可受邪邪若傷之朝發夕死夕發朝死若傷心支別絡而痛者則乍閒乍盛休作有時任娠之人感其病者痛不已氣乘胞絡傷損子臟則令動胎凡胎動則

胎轉移不安不安而動於血者則血下也

任娠心腹痛候

任娠心腹痛者或由腹內宿有冷疹或新觸風寒皆因藏虛而致發動邪正相擊而并於氣隨氣下上上衝於心則心痛下攻於腹則腹痛故令心腹痛也任娠而病之者正邪二氣交擊於內若不時瘥者其痛衝擊胞絡必致動胎甚則傷墮

任娠腰痛候

腎主腰脚因勞損傷動其經虛則風冷乘之故腰痛婦人腎以繫胞任娠而腰痛甚者多墮胎也

任娠腰腹痛候

腎主腰脚其經虛風冷客之則腰痛冷氣乘虛入腹則
腹痛故令腰腹相引而痛不止多動胎腰痛甚者則胎
墮也
任娠小腹痛候
任娠小腹痛者由胞絡宿有冷而任娠血不通冷血相
搏故痛也痛甚亦令動胎也

任娠卒下血候

此謂卒有損動或冷熱不調和致傷於胎故卒痛下血
不止者墮胎也

任娠吐血候

吐血皆由腑臟傷所爲憂思驚怒皆傷臟腑氣逆故吐

血吐血而心悶胃滿未欲止心悶甚者死任娠病之多墮胎也

任娠尿血候

尿血由勞傷經絡而有熱熱乘於血血得熱流溢滲入於胞故尿血也

任娠數墮胎候

陽施陰化故得有胎榮衛和調則經養周足故胎得安而能成長若血氣虛損者子臟爲風冷所居則血氣不足故不能養胎所以致胎數墮候其任娠而恆腰痛者喜墮胎也

皖南建德

周氏校刊

